



Aðalfundur Félags háskólakennara
haldinn mánudaginn 11. maí frá kl. 12:00 – 14:00
í Lóni, fyrirlestrarsal Landsbókasafns - háskólabókasafns

Baldvin Zarióh formaður Félags háskólakennara setti fundinn kl. 12:00 og lagði til að Benjamín Ragnar Sveinbjörnsson verði fundarstjóri fundarins og Helga Birna Ingimundardóttir ritari fundarins. Það var samþykkt einróma.

Benjamín Ragnar hóf fundinn og sagði að samkvæmt lögum félagsins hefði hann verið löglega boðaður með tveggja vikna fyrirvara.

Dagskrá aðalfundar er samkvæmt 5. grein laga félagsins. Gengið var til dagskrár.

1. Lögð fram ársskýrsla.
2. Lagðir fram kannaðir reikningar félagsins skv. alþjóðlegum stöðlum.
3. Ákveðið félagsgjald og hlutdeild félagsgjalda í kjaradeilusjóð sbr. 3. gr. reglna um sjóðinn.
4. Tillögur um lagabreytingar, ef fram koma.
5. Kosin stjórn, sbr. 8. grein.
6. Kosin kjörnefnd, sbr. 8. grein.
7. Kosnir tveir skoðunarmenn reikninga.
8. Önnur mál.

1. Skýrsla stjórnar 2025 – 2026

Baldvin Zarióh formaður Félags háskólakennara flutti skýrslu stjórnar.

Á starfsárinu hefur stjórn Félags háskólakennara einkum beint sjónum sínum að kjaramálum, skipulags- og stefnumótunarmálum félagsins, sameiginlegri hagsmunagæslu akademískra félaga og undirbúningi fyrir stærri verkefni næstu ára.

Á vinnufundi stjórnar í október 2025 voru eftirfarandi málefni sett á oddinn, mótun áhersluatriða næstu kjarasamninga, vinnu tengda Greiningarsjóði háskólafélaganna og skoðun á framtíðarskipan stéttarfélagsmála innan háskólasamfélagsins.

Í kjarasamningum sem undirritaðir voru í september 2024 var ákvæði um launatöfluauka sem tryggir bætur ef launaþróun á almennum markaði fer fram úr launaþróun okkar félagsfólks. Niðurstaða þess var að félagsfólk í Félagi háskólakennara fékk 1,24% launahækkun þann 1. september síðastliðinn. Næsta endurskoðun samkvæmt ákvæði um launatöfluauka mun fara fram 1. september 2026.

Kjaramál

Samhliða gildandi kjarasamningi undirrituðum þann 16. september 2024 voru gerðar bókanir milli samningsaðila, Fh og HÍ. Þær eru þessar, starfsmatskerfið Hera, starfshópar í yfirvinnu í kennslu og launasetningu akademíks starfsfólks og doktorsnema, samgöngustyrkja, símakostnað og vinnu með líffræðilega skaðvalda.

Á liðnum vetri hafa þessi mál verið rædd í samráðsnefnd um kjaramál Fh og HÍ, auk fleiri mála. Þar má m.a. nefna reglur um námsleyfi, launasetning nýdoktora, laun BS nema, fæðismál, þóknanataxti, yfrvinna í kennslu, túlkun á starfsaldri aðjúnkta II, rannsóknamisseri og einstaklingsmál. Staða helstu mála er þessi:

- **Starfsmatskerfið HERA:** Unnið hefur verið að aðlögun starfslýsinga í nýju kerfi og drög verið gerð að launaröðun. HÍ hefur upplýst félagið að fjármagn vegna verkefnisins er tryggt en enn er unnið að útfærslu.
- **Samgöngustyrkir:** Samhliða breytingum á gjaldtöku bílastæða sem tóku gildi 18. ágúst 2025 var samgöngustyrkur sem starfsfólki býðst endurbættur. Hann felur m.a. í sér að starfsfólk skuldbindur sig til að ferðast til og frá skólanum með vistvænum hætti að minnsta kosti tvisvar í viku. Þeir sem velja samkomulagið um vistvænan ferðamáta hafa aðgengi að íþróttahúsi HÍ þeim að kostnaðarlausu og gefst kostur á að kaupa árskort í strætó á 36þkr (í stað kr. 112þkr.). Verð á bílastæðakorti er 1.500kr/mán og getur starfsfólk skráð tvö bílnúmer.
- **Starfskjör doktorsnema:** Félagið skipaði sína fulltrúa í starfshóp sem hafði það verkefni að skoða fyrirkomulag doktorsstyrkja. Ekki hefur verið fundað í nefndini á liðnum vetri. Fulltrúi styrkþega í stjórn félagsins sendi Jafnréttisnefnd HÍ erinfi þann 7. nóv. sl. vegna samspils veikindaréttar doktorsnema og fæðingarorlofs. Þá sendi félagið erindi til Styrktarsjóðs BHM vegna áhrifa breytinga á reglum sjóðsins sem tóku gildi 1. september 2025, á kjör doktorsnema í nóvember 2025 vegna hækkunar á lágmarksiðgjaldi til eiga fullan styrk úr sjóðinum. Svar barst félaginu í apríl 2026 og stjórn sjóðsins hefur ákveðið lækka viðmiðunarupphæð iðgjalds til réttinda í sjóðinum sem mun koma doktorsnemunum til góða.
- **Líffræðilegir skaðvaldar:** Á liðnum vetri hefur verið unnið að eyðublaði og kortlagningu vinnustaða þar sem starfsfólk vinnur með líffræðilega skaðvalda. Sú vinna hefur dregist úr hófi fram en stjórn félagsins sér fram á að henni ljúki nú á vormisseri. Þeir sem uppfylla skilyrðin fá ígildi eins launabreps í formi tímabundinnar þóknunar frá 1. janúar 2024.
- **Reglur um námsleyfi:** Á fundi háskólaráðs 5. júní 2025 voru lagðar fram breyttar reglur um námsleyfi starfsfólks í stjórnarsýslu og stoðþjónustu. Félag háskólakennara mótmælti skerðingum vegna námsleyfa en í drögum að nýjum reglum voru m.a. réttindi til dagpeninga skert. Auk þess hafa verið skilgreind styttri námsleyfi sem munu skerða rétt starfsfólks til lengri námsleyfa þegar fram í sækir. Félagið sendi inn umsögn við drögin þar sem gerðar voru athugasemdir við verklagsregluna í heild sinni. Niðurstaðan var að HÍ tók tillit til athugasemda félagsins í lokaútgáfu verklagsreglanna og gefa þær m.a. kost á dagpeningum en með skilyrðum þó.
- **Fæðisfé:** HÍ boðaði breytingar á fyrirkomulagi fæðisfés og matarmiða vorið 2024. Í stað þess að greiða fæðisfé eða veita aðgang að matarmiðum þá stefndi Háskólinn á að fella niður fæðisfé og matarmiða og fjármagna þess í stað afslætti gegn framvísun korts í Hámu og e.t.v. fleiri stöðum í framtíðinni. Félag háskólakennara mótmælti þessum fyrirætlunum.

Starfshópur um matarmál starfsfólk var settur á fót í lok september 2024 til að útfæra tillögur að nýju fyrirkomulagi matarmála en markmið breytinganna er að bæta aðstöðu fyrir starfsfólk til að njóta matar og kaffiaðstöðu, auka gæði máltíða og bæta aðgengi að hollum

mat og að nýta betur fjármagn og stuðla að aukinni umhverfisvernd. Upphaflega átti nefndin að skila af sér fyrir lok október en sá tímafrestur var lengdur út nóvember. Í starfshópnum voru tveir fulltrúar háskólans auk fulltrúa frá Fh og FPR, formaður Fh var fulltrúi í hópnum. Hópurinn kynnti sér fyrirkomulagið hjá tveimur aðilum nálægt Háskóla Íslands auk fyrirkomulags mála hjá HÁMU. Þá fór rýnihópavinna með fulltrúum frá öllum sviðum auk miðlægrar stjórnsýslu fram. Starfshópur um matarmál starfsfólks lauk störfum í lok nóvember og skilaði skýrslu til háskólaráðs. Í niðurlagi álitsins segir: „*Það er pólitísk ákvörðun sem hvílir á herðum yfirstjórnar háskólans að afnema fæðisfé og semja við aðila um veitingarekstur á svæðinu. Það framboð og sú mynd sem er á þjónustu við starfsfólk í dag dugir engan veginn til að réttmætt sé að taka af fæðisfé og því er breytinga þörf.*“

HÍ ákvað að fara ekki að tillögum nefnarinnar sbr. tilkynningu mannauðssviðs HÍ til starfsfólks 14. apríl 2025. Starfsfólk HÍ fékk formlega uppsögn á fæðisfé í lok júlí 2025 og tóku breytingarnar gildi þann 1. ágúst. Breytingin felur m.a. í sér að starfsfólki stendur til boða að kaupa tilbúinn mat í Hámu á sambærilegu verði og býðst í mötuneyti Stjórnarráðsins, kr. 968. Þá verður annar tilbúinn matur og kaffidrykkir í Bóksölu stúdenta á 30% afslætti. Aðgengi starfsfólks verður auk þess aukið þar sem leitað hefur verið til annarra veitingarekstraraðila á háskólasvæðinu.

- **Starfshópur rektors um vinnuálag:** Félag háskólakennara á tvo fulltrúa í starfshópi rektors um mat á kennsluálagi og viðbrögð við því. Nefndin hefur fundað í vetur og fyrsta skref var að funda með stjórnendum sviða og rekstrarstjórum til að taka stöðumat á kennsluálagi á hverju sviði og leita lausna. Nefndinni, sem tók til starfa um miðjan október 2025, var upphaflega ætlað að skila niðurstöðu fyrir áramót en starfið hefur tekið lengri tíma og niðurstaðna því að vænta á vormisseri 2026.
- **Stjórn Matskerfis opinberra háskóla:** Félag háskólakennara á fulltrúa í stjórn Matskerfis opinberra háskóla. Á fundum stjórnarinnar í vetur hefur verið undirbúin stutt spurningakönnun sem snýr að notagildi matskerfisins fyrir félagsfólk. Gert er ráð fyrir að starfsfólk hafi möguleika á að fylla út könnunina með næsta framtali starfa. Vonast er til að niðurstöðurnar gefi stjórninni raunhæfa mynd af notagildi matskerfisins fyrir akademískt starfsfólk og gefi forsendur fyrir mögulegum úrbótum á **kerfinu**.

Greiningarsjóður háskólafélaganna

Mikilvæg nýjung á árinu var stofnun Greiningarsjóðs háskólafélaganna. Þann 4. september 2025 undirrituðu Félag háskólakennara, FÍN, Félag háskólakennara á Akureyri og Félag prófessora í ríkisháskólum samstarfssamning um nýjan sjóð sem ætlað er að efla greiningarvinnu um hag og starfsumhverfi háskólamenntaðra sérfræðinga og akademíks starfsfólks. Þarna var stigið mikilvægt skref í að styrkja sameiginlega þekkingaruppbyggingu og málefnastarf félaganna fjögurra til framtíðar.

Formaður Fh er fyrsti formaður sjóðsins en sjóðurinn réð Halldór Valgeirsson sérfræðing í tölfræðigreiningum til starfa og hóf hann störf á þann 1. desember 2025. Rekstrargrundvöllur sjóðsins felst í svo kölluðu 0,1% gjaldi sem greitt er af launum ríkisstarfsfólks innan félaganna fjögurra, en því gjaldi er einmitt ætlað að standa straum af kostnaði sem fellur til vegna ýmis konar vinnumarkaðsgreininga.

Framtíðarskipan stéttarfélagsmála innan háskólasamfélagsins

Á aðalfundi félagsins í maí 2025 kom ákall frá fundarfólki um að stjórn félagsins skoði framtíðarskipulag stéttarfélaga innan háskólasamfélagsins. Á fundi stjórnar í ágúst 2025 var ákveðið að félagið hefji samtalið við Félag háskólakennara á Akureyri og Félag prófessora við ríkisháskóla vegna málsins.

Félögin þrjú skipuðu ófromlega nefnd sem hóf samtal, safnaði ýmsum gögnum og sendi út könnun um málið til félagsfólks í febrúar 2026. Þátttaka í könnuninni var misjöfn eftir starfahópum en niðurstöður benda til þess að það sé vilji til breytinga í þessum málum. Félögin þrjú hafa því ákveðið að halda áfram samtali um tilhögun stéttarfélagsmála í ríkisháskólum og mun starfsmaður Greiningarsjóðsins nú fara í greiningarvinnu fyrir félögin þrjú ásamt FÍN.

Keldur

Forráðamenn Keldna ákváðu að virða ekki áralanga verklagsreglur vegna greiðslna úr vinnumatssjóði við starfslok og því leitaði sá starfsmaður og félagsmaður til félagsins á árinu 2024. Málið var farvegi hjá lögmanni félagsins sem lauk með fullnaðarsigri félagsins haustið 2025. Keldur féllst á kröfu félagsins og hlutaðeigandi fékk greitt samræmi við hana.

Umsagnir

Félag háskólakennara sendi umsögn um tillögur um námsleyfi dags. 19. júní 2025, vegna endurskoðunar verklagsreglna um námsleyfi.

Erlent samstarf

Vorið 2025 sóttu sex fulltrúar félagsins fund norrænna systursamtaka sem haldinn var í Vasa í Finnlandi. Fundurinn var vel skipulagður og á dagskránni var m.a. kjaramál og samanburður launa milli landanna, vinnutími og álag í akademískum störfum, akademískt frelsi ásamt stefnu stjórnvalda í vísindum og háskólamálum á Norðurlöndum.

Háskólaþing:

Íris Hrönn Guðjónsdóttir sat Háskólaþing 19. nóvember 2025, sem fulltrúi félagsins.

BHM

Félag háskólakennara er fjórða fjölmennasta aðildarfélag bandalagsins og tekur virkan þátt í störfum þess og á eftirfarandi fulltrúa í stjórnnum og nefndum:

Stjórn BHM: Íris Davíðsdóttir ritari Fh situr í Framkvæmdastjórn BHM.

Formannaráðsfundur BHM: Baldvin Zarióh formaður, situr í formannaráði BHM. Íris Davíðsdóttir situr einnig fundina vegna stjórnarsetu í BHM.

Jafnréttisnefnd BHM: Sunna Kristín Símonardóttir er formaður jafnréttisnefndar BHM og var fulltrúi félagsins í nefndinni, þar til hún hvarf til annarra starfa.

Kjaranefnd BHM

Kolbeinn Hólmur Stefánsson situr í kjaranefnd BHM

Framboðsnefnd BHM: Ármann Höskuldsson er varamaður í framboðsnefnd BHM.

Kjörstjórn BHM: Baldvin Zarióh var varamaður í kjörstjórn BHM.

Nefnd um innri málefni BHM: Baldvin Zarióh formaður, hefur tekið þátt í störfum nefndarinnar á starfsárinu.

Starfsmenntunarsjóður BHM: Helga Birna situr í stjórn sjóðsins fyrir hönd félagsins.

Íris Davíðsdóttir flutti skýrslu Starfsþróunarsjóðs Félags háskólakennara (SFH), fór meðal annars yfir tölfræði og þeim vanda sem sjóðurinn kemur til með að standa frammi fyrir þar sem umsóknum hefur fjölgað og útgreiðslur hækkað. Íris sagði frá því að stjórn sjóðsins hefur lagt mikla áherslu á að kynna sjóðinn og möguleika félagsmanna og stofnana á að nýta sér þau réttindi sem honum fylgja. Þær áherslur hafa sannarlega skilað sér í fjölgun umsókna á liðnum vetri.

Fundarstjóri opnaði fyrir umræðu um skýrslu stjórnar Fh og stjórnar SFH.

Anna Jóna spurði um stöðu stofnanasamnings HÍ og hvort einhverra breytinga væri að vænta. Baldvin svaraði fyrirspurninni.

Védís spurði hvort óskað hafi verið eftir tölfraði um nýtingu samgöngusamninga? Baldvin svaraði fyrirspurninni. Umræður áttu sér stað um málefnið og ákveðið að beina því til stjórnar að óskað verði eftir þessum tölum hjá samráðsefnd.

Elvar vildi hvetja stjórn um að gera betur í samgöngusamningi.

Ekki komu fleiri spurningar undir þessum lið.

2. Ársreikningur

Íris Hrönn Guðjónsdóttir gjaldkeri stjórnar, lagði fram og kynnti kannaða reikninga félagsins, kjaradeilusjóðs og Starfsþróunarsjóðs Félags háskólakenna, fyrir árið 2025.

Rekstrarreikningur félagsins ársins 2024 sýndi rúmlega 27,8 milljóna hagnað og eignarstaða félagsins er góð og nemur handbært fé í árslok rúmum 60 milljónum króna. Þessi góða staða er ekki síst komin til vegna þess að félagið fékk til sín 0,1% framlag skv. grein í kjarasamningi, sem áður hafði verið lagt inn á reikning BHM.

Kjaradeilusjóður á eignir sem nema tæplega 160 milljónum króna.

Starfsþróunarsjóður skilaði rúmum 40 milljóna króna tapi og á eignir sem nema rúmum 147 milljónum króna.

Fundarstjóri gaf fundarmönnum kost á því að koma með spurningar um ársreikning félagsins.

Engar spurningar bárust.

Fundarstjóri bar upp ársskýrslu stjórnar til samþykktar og var hún samþykkt einróma. Þá bar fundarstjóri ársreikninginn upp til samþykktar og var hann samþykktur einróma.

3. Félagsgjald og hlutdeild félagsgjalda í kjaradeilusjóð

Engar tillögur um breytingu félagsgjalda og hlutdeild þeirra í kjaradeilusjóðu lágu fyrir fundinn. Fundarstjóri bar upp tillögu til óbreyttra félagsgjalda og var hún samþykkt.

4. Tillögur um lagabreytingar

Engar tillögur til lagabreytinga lágu fyrir fundinn.

5. Kosning stjórnar

Í bréfi kjörnefndar til stjórnar dags. 28. apríl 2026 er lagt til eftirfarandi:

Formaður til eins árs:

Íris Davíðsdóttir, verkefnastjóri við þróunarsvið miðlægrar stjórnsýslu.

Meðstjórnendur til tveggja ára:

Ármann Höskuldsson, rannsóknaprófessor við Jarðvísindastofnun Verkfræði- og náttúruvísindasviðs.

Ragna Kemp Haraldsdóttir, dósent við Félagsfræði-, mannfræði- og þjófræðideild Félagsvísindasviðs.

Rósa Signý Gísladóttir, dósent við íslensku- og menningardeild Hugvísindasviðs.

Fulltrúi launþega á styrk til eins árs:

Zulaia Johnston da Cruz, doktorsnemi við Menntavísindasviðs.

Fundarstjóri gerði grein fyrir stjórnarkjöri. Félagsmönnum var sendur tölvupóstur þar sem þeir voru hvattir til að bjóða sig fram til stjórnar Félags háskólakennara og senda framboð til kjörnefndar félagsins. Eitt framboð kom fram til formanns, þrjú um aðra stjórnarmenn og eitt framboð fyrir fulltrúa á styrk. Ljóst var því að ekki þarf að kjósa um sæti í stjórn félagsins.

Fundarstjóri tilkynnti að sjálfkjörið var í embætti formanns og fékk Íris Davíðsdóttir lófaklapp frá fundarmönnum.

Þá tilkynnti fundarstjóri að ekki þyrfti að kjósa um sæti stjórnarmeðlima til tveggja ára þar sem Ármann, Ragna og Rósa Signý væru sjálfkjörin. Öll hlutu þau lófaklapp fundarfólks.

Fundarstjóri tilkynnti að sjálfkjörið var í embætti fulltrúa launþega á styrk og fékk Zulaia lófaklapp frá fundarfólki.

6. Kosning kjörnefndar

Tillaga stjórnar um kjörnefnd lá fyrir og var eftirfarandi:

Kjörnefnd:

Anna Jóna Ingu Ólafardóttir.

Kristín Harðardóttir.

Fundarstjóri sagði að Sverrir Guðmundsson gefur ekki kost á sér áfram í kjörnefnd. Óskað var eftir tillögu úr sal. Eitt framboð barst frá Reyni Erni Jóhannssyni.

Fundarmenn samþykktu tillögu stjórnar og framboð Reynis með lófaklappi.

7. Kosning skoðunarmanna reikninga

Tillaga stjórnar um skoðunarmenn reikninga lá fyrir og var eftirfarandi:

Skoðunarmenn reikninga:

Sigríður Jónsdóttir

Reynir Örn Jóhannesson

Fundarstjóri bar upp tillögu stjórnar

Engin mótframboð komu fram og var tillaga stjórnar samþykkt með lófaklappi

8. Önnur mál

Fundarstjóri sagði að þeir sem óski eftir því að taka til máls gefi merki og kynni sig.

Kolbeinn Hólmar Stefánsson bað um orðið og lagði fram eftirfarandi ályktun:

„Aðalfundur beinir þeim tilmælum til stjórnar Félags háskólakennara að halda áfram viðræðum við Félag prófessora við ríkisháskóla og Félag háskólakennara á Akureyri um mögulega sameiningu félaganna. Það er mikilvægt að viðræðurnar fari skipulega fram með skýrri tímaáætlunum, skilgreindum verkefnum og vörðum til að hægt sé að meta framvindu þeirra og að þær beri árangur, enda afar mikilvægt að niðurstaða liggi fyrir áður en næsta kjarasamningalota hefst.“

Umræður sköpuðust um tillöguna. Fundarstjóri bar upp ályktunina og var hún samþykkt samhljóða.

Védís spurði af hverju aðalfundurinn væri ekki einnig á rafrænu formi. Ármann svaraði spurningunni og sagði að fyrir liggur að stjórn félagsins skipi starfshóp um lagabreytingar. Í þeirri vinnu verði m.a. horft til þess að festa í sessi að aðalfundur verði blanda af rafrænum- og staðfundi. Þá liggur einnig fyrir að breyta þurfi stjórnartíma formanns. Samkvæmt gildandi lögum er formaður kosinn til eins árs í senn. Það er of stuttur tími og flestir sammála því að lengja stjórnartíma formanns.

Rósa Signý bað um orðið og sagði að nafn félagsins væri villandi. Ekki væru allir kennarar í Félagi háskólakennara. Hvernig viljum við skilgreina okkur? Rétt væri að skoða nafnabreytingu á félaginu til framtíðar. Málið rætt. Þeir sem tóku til máls voru sammála um að rétt væri að skoða nafnabreytingu á félaginu. Ragna Kemp benti á að inn í þessa umræðu blandist einnig sameiningarviðræður og það eitt gæti kallað eftir nafnabreytingu.

Fundarstjóri þakkaði fundarmönnum góðan fund og gaf fráfarandi og nýkjörum formanni orðið.

Baldvin þakkaði fyrir það traust sem hann hefur fundið fyrir sem formaður félagsins. Þakkaði hann sérstaklega stjórn og framkvæmdastjóra félagsins fyrir gott samstarf og hvatti stjórn áfram til góðra verka.

Íris Davíðsdóttir, nýr formaður félagsins sleit fundinum og vildi þakka Baldvin fyrir sín störf í þágu félagsins á liðnum árum. Þá þakkaði hún sérstaklega Katrínu Pálma. fyrir gott samstarf í stjórn og bauð nýtt stjórnarfolk, Rósu Signýu og Zuíala velkomnar til starfa í stjórn félagsins.

Fleira ekki gert.

Fundi slitið kl. 13:30.

Fundarritari, Helga Birna Ingimundardóttir.